



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir yimym

TAPAK 8

Nikki Haley-i US tir atema metokteptsü

Yashasvi Jaiswal Test ranking nung top 10-i iogo

VOL. XXI ISSUE NO. 144 (ADOK 144) DIMAPUR YANGTEPNÜ (THURSDAY) METSÜREMI (MARCH) 07, 2024 ₹ 5.00

SAPO-i Mao nunger meindoker

Kohima, March 6, 2024 (TYO): Southern Angami Public Organisation (SAPO)-i Angami lushi nung aliba Mao nungertem pei pei yimtsüngi aotsü tetuyuba agütsüogo.

"Mao Council-i ashishitep aliba Kezoltsa nungi Manipur Security Forces manientetba atema Angami lushi nung alir Mao nunger ajak sobaliba inyakyim

nung aliba ama pei pei yimtsüngi aotsü atema tetuyuba agütsütsüsa akümer" ta SAPO president Tepulhopovi aser general secretary Swelul Pucho nati sangdong ka nung ashi.

Angami lushi nung aliba Mao nungertem kümzüka ayutsü aser lendong nungi jenbua lidaktsütsü atema iba mapa inyaktsüsa akümer ta SAPO-isa metetdaksüogo.

ED-i Dimapur nung nisung 299 anema ken o benok

Dimapur, March 6, 2024 (TYO): Directorate of Enforcement (ED)-i Nagaland kübok Dimapur nung nisung aser telok 299 anema ken o ka benokogo.

Special Court (PMLA), Dimapur tsüngdang benokba ken o nung Chinese nunger telok 76 aser bendangertemi ketdangsüba telok 2 dena lir.

Special Court, Dimapur-i March 5, 2024 nü tai tonglokja lir nisung 299 anema benokba Prosecution Complaint agizükogo.

Cyber Crime Police Station, Kohima (Nagaland)-i Indian Penal Code, 1860 aser Information Technology Act kübok arla balala nung ajemdaker FIR ka agütsüba nung ajemdaker ED-i bushisüngdang ka tenzüka liasü.

Item nisung aser teloktemi "HPZ Token" ta ajaba App ka ajanga nisungtem dang Bitcoins aser tanga Crypto Currencies

angutsü atema sen agütsütsü shia nisungtem ashioxtsü ta Kohima Police-i agütsüba FIR nung shia lir.

Ozüng alema online gaming aser Bitcoin mining atema taila directors /proprietors aliba teloktemi Bank accounts aser Merchant IDs aika lapok ta ED-i bushisüngdanga arudang bushitet.

Nisung kati Rs. 57,000 agütsüra ita asem atema anogoshia Rs. 4,000 agütsütsü ta nangzük saka senji khen dang agütsü aser iba sülen sen meshi.

Tesüiba nung ED-i linük kübok tesem balala 44 mita ao aser idangji banks/virtual accounts balala nung yua aliba sen Rs.176.67 crore, sota ayu. Maneni parnokisa Rs. 278.70 crore alangba rongsen aser kiojentem sota lir.

Tang tashi nung ED-i Rs. 455.37 crore tashi puogo aser maneni bushisüngdang südar.

Foothills road nung yaritepba atema pelar: NFHRCC

Dimapur, March 6, 2024 (TYO): Nagaland Legislative assembly session nung Foothills road asoshi Rs.148.5 crore lezmüksüba atema pelar ta NFHRCC-i metetdaksüogo.

Chief Minister Nephui Rio, PWD(R&B) Minister Kaito Sema aser 14 buba MLA nung züngsem ajaki assembly nung iba onük benoka lemsateper sen lezmüksüba atema tenüngsang agütsür ta NFHRCC -i ashi.

Maneni, Department of Public Works, Road and Bridges-i NLA nung olemtepdang technical osang lemsatepba atema kanga pelar ta parnokisa ashi.

Foothills Road mapa ya CSOs ajanga tenzüka aser 2013 küm Kin Hohotemi pusema nungit. Tesüiba küm 11 tsüngda state sorkari iba mapa nung kanga dang mulungsoa Rs.100 Crores agütsüogo ta NFHRCC-isa metetdaksü,

NFHRCC teloki October 2023 nung Nagaland Governor La. Ganesan den ajurutepdang

September 2022 nung NLA bangzüng renemba ama inyaktsü nangzükba atema pelaba metetdaksüogo.

NFHRCC-i December 2023 nung Minister for DONER G Kishan Reddy den ajurutepa iba onük lemsatepogo.

Maneni, MP (Rajya Sabha) Phangnon Konyak-ia bangdak Ministry dangi shidi ka zülutsüba aser kin hohotemi pusema nungitba atema kanga pelar ta NFHRCC-isa metetdaksüogo.

Road & Bridge Department aser District Administration-i tesüiba nung Doyang Bridge kümzüka ayutsü atema lung magitetsü sangdong agütsüba nenshitsu mepishir ta NFHRCC-isa ashi.

NFHRCC-i March 9, 2024 anepdang 11:00 ako nung NFHRCC Base Office, Kher Mahal, Dimapur nung Divisional EEs, PWD (R&B) den senden ka amentsü jazüker anungji züngsem ajak adentsü metetdaksüogo.

SCERT Nagaland-i school counselling atema diploma course tenzüker



Kohima, March 6, 2024 (TYO): Nagaland State Council of Education Research and Training (SCERT)-i Bodbar nungi School Counselling atema fifth batch diploma course tenzüker.

SCERT-isa tanü one year diploma course atema curriculum aser syllabus sayaogo.

"School Counselling Programe ya 2018 küm tenzüker aser linük nung Diploma in School Counselling agütsüba mezüngbuba SCERT ji SCERT Nagaland lir" ta SCERT Director Kevirale-ü Kerhuo-i SEIMAT Hall nung sorkar tesayur 26 den jembidang ashi.

Mezüngbo iba course ya ita trok atema agi aser iba sülen ita 9 agi saka 2023 küm state cabinet-i mulunga agizükba sülen küm ka agir, ta lai ashi.

Nagaland nung school shia nung tetsür aser tebur school counsellor kaka alitsü nükjiong nung iba course agir, ta Kerhuo-isa ashi.

Iba training nung Development of Knowledge,

Development of Skills aser Development of Attitude nükjiong asem nung temulung agütsütsü ta laisa shisem.

Item nükjiongtem nung ajemdaker SCERT-i one year Diploma in School Counselling syllabus tasen ka renemogo. Iba syllabus ya mongintem aser St. Joseph University, Chumoükedima nungi subject experts teyari agia yanglu, ta SCERT Director-isa metetdaksü.

Iba syllabus tasen yangluba atema Head of School Counselling SCERT Dr. Zavisé Rume-i anir counsellor aser professionals ajak nem tenüngsang agütsür ta laisa ashi.

"Tesüiba nungbo kaketshirtemi school nung meinprong kecha melii dang azüng aser counselling agitsü nungdak maliasü, kechiyong kaketshirtem khuret teimbaka kidang tsüraburtem aser talisa tetsütemi dang aben" ta Dr. Zavisé Rume-i ashi.

"Ajisüaka tanü putu nung tanurtem tebilemtsü aika ajurur

aser tsürabur teimbaka mapa inyakba ajanga pei chirnurtem nem mapang magütsüteter. Tanurtemi khuret aser timtem aika ajurur aser parnok taliba merangtsüsa akümer, anungji parnok anitetsü atema mongin nisungtem nungdaka kümogo" ta pai ashi.

"Shisaluyimba wadang nung Guidance aser Counselling ya kanga nungdaker aser technology tasentem adokba mapang tanurtemi mobile o computer kanga bulua amshir aser ano machimajemtsü amshir" ta Dr. Zavisé-isa ashi.

Department of School Education-i Samagra Shiksha ajanga tesayurtem angati dang school education nung diploma course agidaktsür. Tan batch atema menden 50 lir saka tesayur 26-i dang tenüng agüja lir aser menden 24 tazüng lir, ta paisa ashi.

"Sorkar tesayurtemi iba training nung adentsü mepishir aser nübo peria marura nija tesayurtem jaoktsü" ta Dr. Zavisé Rume-isa ashi.

NPCC-i tanü Lok Sabha candidate metetdaksütsü

Kohima, March 6, 2024 (Agencies): Nagaland Pradesh Congress Committee (NPCC)-i March 7, 2024 nü Lok Sabha elections atema candidate shimba osang metetdaksütsü.

April aser May tsüngda agitsü aliba Lok Sabha Elections atema party-i candidate 7 asadangogo ta NPCC president S Supongmeren Jamir-i ashi.

"Onoki candidate tenet

shimtet aser parnok tenüngtem national screening committee dangi yokogo" ta pai ashi.

Bodbarnü Niuland nung osangbener den jembidang Congress-i taküm Lok Sabha elections nung tokteptsü ta NPCC president-i ashi.

Tanga political party tem den tesentaktep ayutsü asü masü ta osangbeneri asüngdangdang "nungdak dang süra Rising

Peoples Party aser Naga Peoples Front dena INDIA bloc den amaliteptsü lenmang lapoka lir" ta Supongmeren-i langzü.

Kütem süia arudang Nagaland Congress-i tetsükdaktsü aiben ajuruogo. Küm 20 tashi parnoki Nagaland Lok Sabha menden nung takok menguteti arur aser taoba state assembly elections ana tashi nung candidate kati danga takok mengutet.



Nagaland Veterinarians' Association (NVA) general conference 2024 nung Animal Husbandry & Veterinary Services Advisor Kazheto Kinimi den külemi tangartem agiba noksa ka angur. Iba mungdang nung 2024-2026 kümsük atema NVA ketdangpurtem shimdang Dr K N Zubemo Humtsoe-i maneni president inyaktsü shim. Pa den yariteptsü atema Dr Vikato Sema-i general secretary, Dr Aoyimsen Jamir-i vice president, Dr Vikuolie Mezhatsoe-i assistant general secretary, Dr Easter Krocha-i finance secretary, Dr Rebecca Khing-i treasurer aser Dr Tolto Metha-i information & publicity secretary inyaktsü shimogo. (Kohima, March 6)

National Clean Air Programme kübok Dimapur nung awareness sentong ayongzük



Longru yanglur, litem ayoker aser longsang menüngertem den Deputy Commissioner, Dimapur indang Conference Hall nung March 6, 2024 nü awareness sentong ka agidang tangokba noksa nung angur.

Dimapur, Metsüremi/March 06 (TYO): National Clean Air Programme kübok longru yanglur, litem ayoker aser longsang menüngba unit tem asoshi awareness sentong ka District Administration, Dimapur ajanga Deputy Commissioner, Dimapur indang Conference Hall nung March 6, 2024 nü ayongzükba liasü.

ADC & Administrator, East Dimapur Town Council, Mhalo Humtsoe-i iba sentong ayongzükba nükjdong lemsatepba mapang, Dimapur nung litem ayoker, longru yanglur aser longsang

menüngba unit tem teyari nung mopung temürekba kumdaktsütsü nükjdong nung iba sentong ya ayongzük ta ashi.

Lokti tentet balala anisemer States/UTs 24 nung aliba yimti 131 (non-attainment cities and Million Plus Cities) nung mopung tajungba kumdaktsütsü nükjdong nung Ministry of Environment, Forest and Climate Change (MoEFCC) ajanga National Clean Air Programme (NCAP) ya January 2019 nung tenzük, ta lai ashi.

Lai lokti tentet balala dang nüburtem asoshi khuret bona

Dimapur nung mopung tajungba kumdaktsütsü lenmang bushitsü ayongzükba liasü.

Laisa anogo ishika tsüngta guidelines agütsütsü aser iba sülen shidak anidaktsüla, ta ashi.

Iba sentong nung menden ya EAC Dimapur, Imlijungla Lemtur liasü aser Rongsenben Longkumer, Junior Scientific Assistant, Nagaland Pollution Control Board (NPCB) ajanga Mission LiFe indang lemsatep aser Yanathung Kithan, Scientist 'B' (NPCB) ajanga Air Pollution and Regulations Related to Pollution Industries indang lemsatepba liasü.

Assam Rifles temi sentong balala ayongzük

Dimapur, Metsüremi/March 06 (TYO): Assam Rifles temi ITC Dan (Upper & Lower), Pangsha (Old & New) & Chingnyu yimtsüngtem nungi CSOs tem den FONE (Friends of Northeast) senden ka takok ngua agiogo.

Iba senden nung security dak

sendakba, emergency protocols aser temulung melemtetsüsa inyaksangshiba atema osangtsüsang agiteptsü asoshi jembia liasü.

Arütsülen aliba nüburtem kumzüka ayutsü nükjdong nung Assam Rifles temi mapa tajungb inyakba iba senden ajanga tali

tajungba sayur.

Maneni Assam Rifles temi Holy Angels School, Noklak nung aliba kaketshirtem atema HIV awareness lecture ka agüja liasü.

Lanurtem nem iba tashidak indang tali tajungba angatetdaktsütsü nükjdong nung iba sentong ya ayongzük.

BBBP kübok DCA Course indang Batch tanabuba tenzükogo



Diploma in Computer Application Course indang batch tanabuba tenzükba sentong ka Deputy Commissioner, Kohima indang Conference Hall nung March 6, 2024 nü agidang tangokba noksa ka nung EAC (Dev) Kohima, Moasunep K. Jingru; Managing Director, Pioneer Institute, Kiviboto Shequi aser ketdangsurtem den 2nd batch students tem angur.

Dimapur, Metsüremi/March 06 (TYO): Beti Bachao Beti Padhao kübok Diploma in Computer Application Course indang batch tanabuba tenzükba sentong ka Kohima District Administration ajanga District Hub for Empowering of Women, Kohima den lungjemer Deputy Commissioner, Kohima indang Conference Hall nung March 6, 2024 nü ayongzükba liasü.

EAC (Dev) Kohima, Moasunep K. Jingru-i iba sentong nung tarur pela agizükba o jembidang District Hub for Empowering Women aser Pioneer institute ajanga

kaketshirtem asoshi iba course agütsüba nung yariba atema pelaba lemsatepba liasü.

Technology balala tejakleni aoba den lirumedema aotsü asoshi computer amshiba tsütsü hand-on skill shidakba nüngdaker, ta pai ashi.

Iba sentong ya tetsür nem tashi aser temeden agütsüba campaign ka lir aser iba nisung ishikati dang iba course agir asünung temulung agütsütsüla, ta pai ashi.

Paisa kaketshirtem dang iba course ajanga pei sempet tajungba akumtsü aser nüburtem asoshi rongsen ama

akumtsü ajungshia liasü.

Managing Director, Pioneer Institute, Kiviboto Shequi-i iba course indang rasaa ashiba mapang, sorkar mesüra private organisation nung mapa angutsü asoshi DCA ya tongtipangtiba kumogo, ta ashi.

Pioneer Institute ajanga kaketshir nem Microsoft Office package den Photoshop aser danga yimyatem sayur, ta pai ashi.

Iba sentong nung Gender Specialist, DHEW Kohima, Vikeduoza Sorhie menden liasü aser LDA, Kekhriesilie Chadi-i sarasadem.

Agnipath Scheme atema online exam April 22 nung tenzüktsü

Dimapur, Metsüremi/March 06 (TYO): Army Recruiting Office, Rangapahar, Dimapur ajanga sangdong ka nung Agniveer exam atema Nagaland nungi temsüa aliba aser jangra aliba candidate tem dang pei tenüng zülüoktsü ashi.

Online registration ya February 13, 2024 nungi lapoktsü aser March 22, 2024 tashi alitsü aser online exam ya April 22, 2024 nungi tenzüktsü. Sangdong ajangasa jangra

aliba candidates tem dang peu Aadhaar Accounts ya mobile number den sendaktsütsü aser Indian Army nung recruitment atema apply masüadang Digilocker Account ka lapoktsü ashi.

Nüngdakba documents aser eligibility criteria atema 03862-249012 mesüra 8974958673 nung jembitetsü aser arorangapahr77@gmail.com dangi email sütettsü, ta sangdong ajanga ashi.

Tseminyu DC ajanga traffic advisory metetdaktsü

Dimapur, Metsüremi/March 06 (TYO): International Women's Day 2024 nungtem nung District Administration Tseminyu kübok District Hub for Empowerment of Women ajanga March 7, 2024 anepdang 6:30 ako nungi 7:30 ako tashi mini marathon race ka ayongzüktsü, ta Deputy Commissioner Tseminyu, Rohit Singh, IAS ajanga sangdong ka nung metetdaktsü.

Iba marathon ya Wozhuro Point nungi tenzüktsü aser NH-61 nung asemer Town Hall, Tseminyu nung tembangtsü.

Anungji iba sentong tiptema aser lendong timtem majurui agitettsü mechi traffic tenokdangba alitsü. Anungji senzüsemponger aser nübur ajungai lateta aliba mapang gari mesenzüi atatsü metetdaktsür, ta sangdong ajanga ashi.

KMC Administrator & ERO ajanga senden ayonger

Dimapur, Metsüremi/March 06 (TYO): State Election Commission ajanga March 4, 2024 nü sangdongba ama March 8, 2024 nü draft electoral roll sayatsü.

Iba dak sendakba nung Administrator & Electoral Registration Officer, Kohima Municipal Council, T. Lanusenla

Longkumer-i ward ketdangtsür, GBS aser political party ketdangsurtem den March 8, 2024 nü senden ka jazüka lir.

Iba senden ya KMC Office nung nikongdang 2:00 ako nungi amentsü, anungji tekalen shia alir ajak iba senden nung medema arua adentsü ayongzükter, ta sangdong ajanga ashi.



Shamator District kübok March 6, 2024 nü Kesangwong yimtsüng semzüktsüba mapang tangokba noksa ka nung Advisor, Youth Resources & Sports, S. Keoshu Yimkhiung aser dangartem angur.

Nagaland Miss Mega Model Hunt 2024 atema audition agitsü

Dimapur, Metsüremi/March 06 (TYO): Nagaland Mega Entertainment ayonger temi sangdong ka ajanga ashiba agi, Nagaland Miss Mega Model Hunt Season 3 atema open aser final audition ya March 9, 2024 anüngdang 11:00 ako nungi nikongdang 3:00 ako tashi Hotel Japfu, Kohima nung ayongzüktsü renema lir.

Iba model hunt nung takok angurtem ya maongka balala angutsü aser Miss Queen Universe India nung Nagaland tenüng nung shilem agitsü, koba Dubai nung August ita agitsü lir.

Iba pageant nung takok angur nem sen 200,000 jenjang senpet aser gift hampers agütsütsü.

Jangra aliba candidate temi iba maongka agia iba sentong nung shilem agitsü ayongzük. Nagaland Mega Entertainment ya event management ka lir, koba ajanga

lanurtem pei mangdang ataloktsü asoshi jenjang ajungkettsür. Taküm iba model hunt indang omen ya 'Say no to drugs save a life, help the disabilities and promote the orphans' alitsü.

Iba pageant nung shilem agitsü asoshi tar 5.5 ft bo asütsüla aser arishi küm 17 nungi 27 tsüngta asütsüla. Audition atema dress code ya tank top temesung aser jeans (tanak mesüra tanen) den heels asemtsüla.

Open aser final audition nung shilem agitsü nisung shiai audition fee sen 300 agütsütsüla.

Open final auditions atema tetendangertem ya Auden Lama (hair, makeup artist and choreographer); Samuel Achy Phom (Founder and President Nagaland Mega Entertainment); Mesülou Thele (Designer) aser Thejavizo Venuh (Mr. India Globe 2022 Winner) alitsü.



March 06, 2024 nü New Delhi nung National Youth Parliament Festival nung Union Minister for Youth Affairs & Sports, Anurag Thakur-i jembidang tangokba noksa nung angur.

Rajasthan nung tetsür lakh 11 'Lakhpati Didi' akümtsü: Bhajanlal Sharma

New Delhi, March 06 (Agencies):

Bodhbarnü Rajasthan Chief Minister, Bhajanlal Sharma-i, state sorkari tetsürtem nem tashi agütsütsü atema inyaker, aser taruba küm asem tsüingda state nung tetsür lakh 11 bo 'Lakhpati Didi' akümtsü, ta metetdaksü.

Linük tesem ajaklen agiba 'Shakti Vandan Abhiyan' tatembangbuba sentong nung Jaipur nung video conferencing ajanga jembidang Sharma-i, Ato kilonser Narendra Modi lenisüba kübok Centre aser state sorkari tetsürtem nem tashi agütsütsü atema inyaker, ta ashi.

Paisa, tetsürtem nem rongsenkettzüng tsütsü tashi agütsütsü aser loktiliba nung tetsürtem nem tashi agütsütsü atema tesüiba küm 10 tsüingda Centre sorkari scheme aika tenzüokogo, ta ashi.

Pradhan Mantri Ujjwala Yojana, Pradhan Mantri Har Ghar Toilet Yojana, Har Ghar Nal Yojana, Deendayal Upadhyay Gram Jyoti Yojana aser PM Awas Yojana ama programs aser scheme balala ajanga linük nung tetsür crore aika tajangzüok nguogo, ta pai ashi.

Chief minister-isa, tetsürtem nem tashi agütsütsü atema central aser state sorkartemi telemtetba agia inyaker; 'Lakhpati Didi' Yojana ajanga tetsürtem nem skill development agütsütsü aser küm ka nung income lakh 1 tashi tutsütsü, ta metetdaksü.

Sharma-i, Centre sorkari linük nung tetsür crore 3 bo 'Lakhpati Didi' kümdaksütsü nükjidong yur inyaker; yamaji Rajasthan nunga iba scheme kanga kera inyakdar, koba ajanga taruba küm asem

tsüingda state nung tetsür lakh 11 Lakhpati Didi akümtsü, ta metetdaksü.

Self-help groups ajanga taruba küm asem tsüingda state nung shilem balala lemsar tetsür lakh 11.24 'Lakhpati Didi' kümdaksütsü atema nükjidong yur inyaker; tang tashi nung state nung tetsür lakh 2.80 bo 'Lakhpati Didi' kümogo, ta pai metetdaksü.

Central sorkar mapatong aser Ato kilonser Modi lenisüba kübok tetsürtem nem tashi agütsütsü atema Parliament nung Nari Shakti Vandan Act agizükogo, ta pai ashi.

Nari Shakti Vandan Act mapa küma benokba sülen Lok Sabha aser state assemblies nung tetsürtem nem menden shilem 33 agütsütsü aser ibaji ajanga democracy inyakyim nung tetsürtemi shilem tulu agütsü, ta pai ashi.

Congress-i caste census agütsü aser MSP benoktsü: Rahul Gandhi

Badnawar, Metsüremi/ March 06 (Agencies): Bodhbarnü Congress lenir Rahul Gandhi-i, election agiba sülen Congress sorkar tasenbai caste census agütsü aser Minimum Support Price (MSP) atema ozüing agizüka benoktsü, ta metetdaksü.

Madhya Pradesh nung tribal nütsüing aika aliba Dhar district kübok Badnawar jila nung Bharat Jodo Nyay Yatra dak sendakba lokti senden ka nung jembidang Rahul Gandhi-i, caste census ji green revolution aser white revolution ama kanga tongtibang telemtetba ka asütsü, ta ashi.

"Caste census ji kanga tongtibang telemtetba ka asütsü. Centre nung onoki sorkar akümba sülen iba telemtetba agütsü. Tanabubaji, aluyimertem nem MSP atema legal guarantee agütsütsü atema ozüing agizüktsü," ta metetdaksü.

Taoba mapang Congress Tiri, caste census agiba ajanga linük nung SC, ST aser backward categories nung nütsüing kwi aliar tejangja metettsü, ta ashi.

"Iba census agiba ajanga item nüburtem rongsenkettzüng jenjang metettsü aser reju balala nung parnok shilem metettsü. Iba census ajanga osang ajak metettsü," ta pai ashi.

Rahul Gandhi-i, "Congress-i loktiliba aser rongsenkettzüng lenlatem nung ajak nem temeden agütsüner. Onoki aluyimertem nem-a temeden agütsüner," ta ashi.

"Haryana aser Punjab nungi aluyimertemi Minimum Support

Price atema dang takhangba agütsür. Ajisüaka BJP sorkari parnok nem MSP magütsütsü ta ashir. Sorkari industrialists 100 dang sentsüh 16 lakh crore tokogo, aser ibaji küm 24 indang MNREGA budget lir, ajisüaka parnoki aluyimertem dangbo sentsüh metokner," ta pai ashi.

"Onoki nenok atema inyaksü, kechiyong nenoki onok nungiter aser pusemer. Nenoki tzü, arem aser ali atema raraba nung onoki nenok nungita yarütsü," ta pai ashi.

Bodhbarnü Madhya Pradesh nung Bharat Jodo Nyay Yatra tembangba sülen nikongdang nungi Rajasthan nung tenzüokogo.

Ano tanga osang ka nung, Rahul Gandhi-i taruba Lok Sabha election nung Amethi menden nungi tokteptsü ta jangjaogo. 2019 küm Amethi menden nung Rahul Gandhi-i BJP lenir, Smriti Irani matsüingdang tamakok ngua liasü.

Rahul-isa Kerala kübok Wayanad menden nungia tokteptsü; taoba election nunga pai iba menden nungi toktepa takok ngua liasü.

Ano Congress lenir Priyanka Gandhi Vadra-ia tang mezüing Uttar Pradesh kübok Raebareli menden nungi tokteptsü. Tesüiba mapang Ato kilonser, Indira Gandhi-i iba menden nungi asemben takok ngua liasü.

Priyanka tetsü, Sonia Gandhi-i Raebareli menden nungi ponguben tashi toktepa liasü saka takümba lai iba menden nungi metokteptsü, ta sangdongogo.

Tang mezüing India nung tzü telung nung metro service tenzüokogo

New Delhi, March 06 (Agencies):

Bodhbarnü Kolkata nung Ato kilonser Narendra Modi-i tang mezüing India nung tzü telung nung senzüba metro services tenzüksüogogo.

Howrah Maidan-Esplanade section ji metropolitan transportation network nung züngokogo aser India nung iba ya tang mezüingbuba underwater metro asütsü.

Metro train ji Hooghly River

ayong telung nung senzütsü; iba ayong ya Kolkata aser Howrah na tsüingda lir. Iba metro ya yaküm April ita nung mezüing tendanga liasü.


1921 küm mezüing British nungertemi mezüing underwater transportation system tenzüksü atema apiteta liasü. Kilometer 4.8 talang East-West ya Howrah Maidan nungi Esplanade tashi senzütsü. Iba metro ya sen crore 4,965 indoka yanglu.

Iba metro semzüksüba sülen

Ato kilonser Modi-i Kolkata nung aliba kaketshir kar den iba metro nung sensaksema jaja.

Metro nungjisa Modi den West Bengal BJP Tir Sukanta Majumdar aser West Bengal assembly nung opposition lenir, BJP MLA Suvendu Adhikari nata liasü.

Modi Kolkata tonga aoba mapang nung Esplanade metro station nung lokti tulu adenshia 'Jai Shri Ram' aser 'Modi Modi' ta ayimdena pa agizüka liasü.



Kolkata, March 06, 2024: India nung tang mezüingbuba underwater metro train Kolkata nung semzüksütsü lia tangokba noksa nung angur. Iba metro train ya Ato kilonser Narendra Modi-i semzüksüogogo.



Chennai, March 06, 2024: State Bank of India (SBI)-i electoral bond osang sangdongtsü atema Supreme Court dang mapang tali meshisemba anema Bodhbarnü Chennai nung CPI(M) nung inyakertermi longkak aيتدang tangokba noksa nung angur.

Madhya Pradesh nung trainer aircraft ka tsükok; tetsür pilot ka yiru

New Delhi, March 06 (Agencies):

Bodhbar nikongdang Madhya Pradesh kübok Guna district nung training agidang amshiba tayimtsü tilaka tsükokba lendong nung tetsür pilot ka yiruogo, ta ketdangsertemi metetdaksü.

Training agidang amshiba tayimtsüji Neemuch nungi Dhana-i apusoa liasü saka technical timtem ka adokba ajanga anentsü merangdang tsükok.

Iba lendong nungji trainee pilot tetsür ka yirua hospital-i anir oa yaridar.

Osangbenertem den jembidang Sub Inspector, Guna, Chanchal Tiwari-i, "Neemuch nungi Dhana-i apusoa aoba trainer tayimtsü nungji technical timtem ka adokba ajanga rongdak anentsü merangdang tayimtsüji mazüokteti tsükok. Iba lendong nung trainee pilot ka yirua hospital-i anir ogo," ta metetdaksü.



TIR YIMYIM YIMOBILEM (EDITORIAL)

DIMAPUR YANGTEPNÜ, MARCH (METSÜREMI) 07, 2024

Shir nem tax agütsütsü?

- P Tiamongba Aier

Nagaland nung Naga yimtenren telok onsara akümba amaji tax/saru talila akümer aser telok shiaji sorkar kaka asünung parnok dak Naga lima nung tax/saru agütsü temeten lir. Kechiyong telok tejentiba süang mesüra tasentiba süang Government of the People's Republic of Nagaland (GPRN) mesüra Federal Government of Nagaland (FGN) amshia tentetba telok shiaji sorkar kaka ta asenoki angatetdi. Naga political group (NPG) ka ama parnoki tax/saru balala meshir aser aji agütsütsüsa akümer. Nagaland nung NPGs longjemtsü aser putepshitsü atema küm aika tejaklen nungi mapa inyaka arur saka longjemtsübaji toktür telok ang talila rashia ogo. NPGs aikati tax meshiba ajanga nübor asoshi tebilemtsü khuret bentsür aruba agi küm aika jembia arur October 2013 nung Nagaland nung Against Corruption and Unabated Taxation (ACAUT) ta ser telok ka tenteta "Sorkar Ka, Saru Ka" yimyim ayimokja mapa inyaka arudar saka tanü tashi iba alizüngji metongteti lir aser külen NPGs-a teimba kümogo. Iba ama tensa ka nung lia arudang March 4, 2024 nü Dimapur Chamber of Commerce and Industry (DCCI)-i ola ka adokba asenoki angashiogo. NPGs-i shishilembartem dang nungi tax onsara saruba aser amokmerenba manenra mapang telatet makai shishilembabaren shibangtsü ta DCCI-i ola adokbaji maremteti adokba ola ka lir aser asenok ajaki süoki ia bilemtsüla. NPGs-i senotsü talitapong meshiba aser amokmerenba ajanga shishilembartem timtemba dang masü saka tetsübu tia ka nung alir anungji state sorkar aser ozüng amertemi shishilembartem item inyakyim nungi kümzüka ayutsüla ta DCCI-isa ayongzükogo. DCCI-i iba khuret atema tang mezüng ola adokerba masü saka yaküma Chümoukedima Chamber of Commerce and Trade Association (CCCTA) den külemi parnoki Naga yimtenren teloktemi ozüng alema tax saruba anentsü metetdaksüogo. Atangji iba khuret ya tuluka lir aser public-ia shishilembartem pusema nungitsü tim. Dimapur nung anogo ka mesüra ghonda ishika atema danga shishilembabaren shibangra sen aika akoksaba asenoki meteta lir. Külen shishilembartemi tax/saru agütsüba nung parnok akoksa dang masü saka public dena akoksar, kechiyong iba saruji asenokia shishilembar den lijaliyongdang yaritepa menoksemdar. Anungji "Sorkar Ka, Saru Ka" yimyim ya maneni ayimtsüla aser iba alizüngji tongtetsüsa asenoki NPGs ketdangpurtem den shisa lemsateptsüla mesüra jembishinü tenzüksü tim. Külen, state sorkari anir Naga yimjung olemtep nung dena alir ajaki iba khuret agientsü atema India sorkar dang mapang matsülangi tekaratiba nung Naga yimten latettsü rongshitsüla. India sorkari yimten latettsü mapang atsülangtsüsa kümra yimjung olemtep nung adenba NPGs nem India sorkari senotsü teyari agütsütsü lenmang bushiteptsüla, kechiaser shishilembartem aser public dang nungi tax/saru meshiba agidangbo sorkar ka inyaksangshia moutettsü. Tawa tu social media sabang ka nung nisung kati NPG shia ministry balala lir aser item nung Ministry of Education mesüra Ministry of Health amala dena lir aser parnoki tax sarur. Anungji parnoki Naga lima nung school, college mesüra shisaliok reju kwi ka lapoka lir, mozü ki kwi yangluteta lir ta metetnüba olen ka lemsatepba angudang atangji NPGs-i tax saruba amaji Naga nung asoshia langka karbo inyaksür asü masü ta tasüngdangba ka arur. Anungji NPG shiai shishilembartem aser nübortemi "Sorkar Ka, Saru Ka" ta adokba ola ya tenoktenoka angashitsüla aser Naga lima meima India sorkar den Naga yimten latettsüba mapa denbo tamasa NPGs ajak ka kuma longjemtsü asoshi ang bilema mapa inyak tajungba südisü ta bilemer. NPGs ajak ya ka kuma longjemtetra tanü DCCI-i adokba ola ya mangashitsü aser teloktenji mesüra kijatemi tax/saru meshiba atema ashishitep kecha melii dang mulungsoa agütsütsü.

OLEMSABANG

Asen sobaliba metsüngareta benshitsüla aser wazüka ayutsüla

- L.Kika Pongener.

(Yashi adok nungi...)

Achi-ajemba: Otsüla-oboula nungeri achi-ajemba nung kanga kümdanga asüngteta lia aru. Otsüla-oboula nungeri chiyungtsüa ta sur tanguba/tajangtetba ajakbo machi/majem. Ochishia tim lenmang nungi bener aruba, asentsü sena meranga inyaker bener aruba agi kibong mesua lia aru. Otsüla-oboula nungeri khen chiyungdang auso nung shi aser ango külemi inoker mechiyung...Auso nung 'Shi aser Ango' külemi inoker chiyungra, Tsüngremi menutsür ta takzüa aru. Arem nung aliba shiruru aser ozü sangnu rongnunga teshimtet kar dang achi. Keyi, Shitsük, Yimpok...Item shi achibaji kanga tesak-sak asür aser nisungdak temeim malir ta atet-aponga aru. Talisa, Keyi shi achibaji ain-aponng tamajung asür ta atet-aponga aru. Ozü-sangnu rongnunga Waro, Elang, Pokpo, Posu item shi machi...Item ozü ya memeruk ama ashi-shia machi. Arem nung Nashi, Ak Keyi-i ngusetar akaba machi...iba dangji 'Shi-shi' ta aja. Kidang mesuba shiruru rongnunga Azü (Dog) shi aser Danu (Cat) shi machi. Ajsuaka, tanü asen putu nung achi-ajemba nung kanga tang mazüok kümogo. Azü shi aser Danu shi ajak mozü tajung aküm aser arem shiruru kata tamachila mali kümogo.

Oshi-Oben: Kechi kin sudir suaka, pei kin oshi-oben ka-ka lir. Oshi-oben ka makara kin ka ta mejatet. Nisung kaji kechi kin'ar pai/lai jembiba oshi-oben jagi jangjatsür. Asen Aor oshi tongpen ana Jungli aser Mongsen lir. Aor senso kati iba oshi ana rongnung kabosa tejangja jembitettsüla. Iba oshi ana rongnung ka danga mejembitetra pa/la dang Aor senso ka ta mejatettsü. Pa/la jagi English, Hindi, Nagamese oshi kanga junga jembitettsü akok, saka pei tetsü taso oshi mejembitetra maaksu tulu lir. Anungji Aor senso ajaki asen oshi Jungli & Mongsen anaprong ya mesamadaktsüi wazüka ayutsüla. Pei kin oshi wazüka ayutsü atema tanür ka sozükli nungi, tsüraburi pai/lai 'O' jembitsü tenzükdangyongi pei oshi nung 'oja-oba' ta ajatsü tenzüka sayutsüla. Koba kin pei tetsü taso oshi samadaktsüdir, iba kin-ji samatsü ana nung lir. Tashitemeteri ashiba agi alima nung oshi karbo sama-a aotsü leper kümbang nung lir, aser item oshi rongnungji asen Ao oshi ya-a dena lir ta ashir. Anungji asenoki asen tetsü oshi ya kanga sapua jembidi aser wazüka yudi.

Jaya-jako : Asen Aor sobaliba nung, jaya-jako benshia aruba jangja-jangja-a, bentet-benteta dang arua lir. Kechi kin sudir suaka, pei kin oshi nung jaya-jako tejangja metettsü kanga tongtipang, aser tsürabur kati pei chirnur tang sozükli nungi ola adokdangyongi jaya-jakoji tejangja sayutsüla. Otsü, obou, oja, oba, odi, oya, oba-tambu, oba-tanübo, oja-tantsü, oja-tanütsü, onu, oko, anuk, amo, tinu, atongbo, kapu, ilang, atongtsü, tenu, tebo...Item ajakji tejangja sayutsüla. Tetsü o tebu na tsürabur tang tanürtemi 'Otsü aser Obou' ta ajar...Tetsü tasola dang 'Oja' ta...Tebu tasor dang 'Oba' ta... Tetsü teyi o tenu nung dang 'Oja tantsü' & Oja tanütsü' ta...Tebu tedi o tenu nung dang 'Oba tambu' & Oba tanübu' ta... Adianu tetsü-tebu kati asoba tambu dang 'Odi' ta aser tanübu dang 'Tenu' ta...Aianu tetsü-tebu kati asoba tantsü tang 'Oya' ta & tanütsü tang 'Tenu' ta... Tebu teyi o tenu nung dang 'Onu' ta...Tetsü tedi o tenu nung dang 'Oko' ta...Adianu agiba kinungtsür tang 'Amo' ta... Aianu agiba kinungbur dang 'Anuk' ta...Onula nung agiba kinungbur tang 'Anuk' ta...Meimtepa jatepa aru. Ano pur-medemer tsüngda nunga, tebur kidong küsa sura 'Tinu' ta...Kidong balala sura 'Atongpo' ta...Tetsürtema kidong küsa sura 'ilang' ta...kidong balala sura 'Atong-tsü' ta... Ano Aor yim tanga kar nung pur-medemer denbo ano 'Kapu' & 'Temba' ta...Keta-sentepa jatepa aru. Anungji jaya-jako ya kangasa tongtipang ta metetdi aser wazüka yudi. Asen chirnuri jaya-jako memetetbaji asenok tsürabur tai asütsü. Anungji tsürabur ajaki pei chirnur tang ...Papa, Mummy, Aunty, Uncle, Cousin, etc. ta mesayui asen oshi temeja agi jaya-jako sayutsüla. Aji oda, asenoki mejashira, putu ishika sulenbo asen oshi nung jaya-jako ya sama-a aotsü ana nung lir.

Nungja-koja: Kin shia pei oshi nung nungja-koja balala lir. Anogo shia asenoki amshiba oset-tem 'Nungja' koba dang kechi koda ajar (?) Nisung shia tsüraburi tenung ka-ka agüja lir...Item tenungtem ajakji sobaliba den sendaktepa lir. Aji oda, item nungja tetezü ajakji tejangja metettsüla aser iba-jia tsürabur kati pei chirnur tang tejangja sayutsüla. Ni iba ocet nung ya ajak ta mesuaka, kanga tongtipang nungja-koja kar tanü putu nungbo kanga-rabo mamshiba aser mejashiba kar lemsatepnur. Aji oda, asenoki tang bulua mejashira lia lia, putu ishika sulenbo samaa aotsü sudi...ta bilemba kar lemsateper...Küttsü, Jangpong, Chikok, Chisang, Kota, Chibo, Anbo, Marok, Auso, Per, Pakti, Lempak, Yongso, Menja, Molok, Chi, Taksep, Tzushi-khu, Liko, Sungden, Menden, Yipden, Langpang, Maküm, Shilangtsü, Kioktsü, Alulem, Mertsüng, Kotarong, Nok, Ninok/Linok...item nungja-koja ajak ya asenoki mejashira tanem-tanemi putu ishika sulenbo sama-a aotsü. Ano kanga-sa tongtipang kaji...Pei kin oshi nung tsürabur naroka aser naroküm ajatsü tenung tajung aika kar sernung...Tangar kin tenung...Anuolen alir temesunger kin tenung ajaba...Tatishitsü...Alfred, Wilson, Edward, Jackson, Lily, Rosy, Sausan...Yamala tenungtem ajar...Item tenungtemji asen sobaliba oshi nungja masü. Anungji akok tashi asen tetsü oshi nung, pei kin tenung jatsüba-sa ajak dang tajungtiba asütsü. Atangji, asen tetsü oshi nung asen sobaliba tenung ajaba jagi pei kin sobaliba, pei kin oshi-oben aser pei kin ayak wazüka ayur ta metetdi.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngeru angateta agütsü mepishir**

UP nung police-i kuli tejangja makai Khristantem anema inyaker



Uttar Pradesh kubok Fatehpur district nung aliba Evangelical Church of India (ECI) Tenla ki noksa nung angur.

March 06, 2024: Article 14 teloki sangdong ka ajanga Uttar Pradesh nung police-i tesüiba küm ka tsüingda Fatehpur district nung aliba Khristan reju pezü anema First Information Reports (FIRs) aika benokba aser nisung 200 dak tema apuba metetdaksü.

2022 küm April 14 nü mezüing Vishwa Hindu Parishad (VHP) nungi züingsem 250 dak temai Fatehpur nung aliba Evangelical Church of India (ECI) Tenla kidang Khristantem tekülem sentong tagidak mapang timtem agütsü. Parnoki Tenla ki telung nungji Khristan 55 shibanga yur yimiyim ayima longkak aita liasü.

VHP züingsem, Himanshu Dixit-i ken o agütsüba nung ajemdaker police-i anti-conversion ozüing kubok Khristan 55 ji pua liasü.

Iba tatalokba sülen ita 9 tsüingda police-i iba Arogoji

anema FIR asem benok.

Iba district nung Khristan reju pezü- küm 118 tain Arogo, Evangelical Church of India (ECI), küm 114 tain Broadwell Christian Hospital, küm 110 tain Sam Higginbottom University, Prayagraj aser Khristan melungtet telok World Vision India-i tangartem Khristan yimsü dangi meyipdaksür, ta tai tonglokja police-i FIR aika benok.

Article 14 teloki ashiba agi, FIR aser chargesheets benokba inyakyimji kasa dang- VHP nung inyaker temi tai tongloktsüba nung ajemdaker Khristan rejtem anema ken o benok, Khristan yimsü dangi meyipdaksüba kuli mali aser police-i bushisüingdangba nungji tashishitsü keta lir.

Uttar Pradesh police-i item FIR nungji ajemdaker pastor tem, hospital staff tem, university ketdangsertem aser

melungtet telok nungji inyaker tem densema nisung 200 dak tema puogo. Article 14-isa, police nem agütsüba kulitemji tejangja masü saka World Vision India-i timtemertem nem sapon aser chiyungtsü agüja tangartem mesüzüka Khristan yimsü dangi meyipdaksür, ta tai tonglokja lir.

Lawyer temi UP nung anti-conversion ozüing dak sendakba tayongzükba onük pezü Supreme Court nem agüja lir, ajisüaka item ken oji tang tashi mangadang.

Taoba mapang Supreme Court nung Justice Deepak Gupta-ibo anti conversion ozüing ya linük temzüing alema lir, ta shiogo.

Uttar Pradesh nung Khristan lenirtemi, tamalen Muslim nungertem anema inyakba ama Yogi Adityanath Chief Minister akümba sülenbo Khristantem anema-a inyaker ama bilemer.

Chhattisgarh nung Khristantemi longkak ait

Raipur, March 06, 2024 (Agencies): Tawa Chhattisgarh yimtiba, Raipur nung aliba Tuta Maidan nung Khristantem meyirjang aika adenshir state sorkar anema longkak aitogo.

Chhattisgarh nung Khristantem anema inyakba tebilemtsü onük bentettsü atema sorkari nendaka meinyakba atema February 28 nü Khristantemi longkak ait.

Chhattisgarh Yuva Manch-i ayongzükba rally "Constitutional Justice & Rights Rally" ji Raipur nung tembanga agi. Iba jakdangji Khristantemi Jagdalpur densema state tesem balala nungi tetsüing agi mesüra bike rally agia Raipur nung adenshiba sülen tatembangbuba sentongji agi.

Tesülen longkak aiterem jagi temepishiba shidi ka police ketdangsertem nem agütsü. Tapak 150 aliba shidi nungji

state nung Khristantem anema inyakba tatalokbatem tejangja shia lir.

State nung Bastar region kubok Hindutva teloktemi tribal Khristantem anema inyakba ajanga opposition lenirtemi iba tebilemtsü ya yimtemren onük ka kümdaktsüogo.

Jagdapur yimti nungi AAP lenir, Narendra Bhawani leniba nung ayongzükba sentongji Arogo dak sendakba telok aikati pusema liasü.

Osangbenertem den jembidang Bhawani-i, tesüiba küm ishika tsüingda state nung Khristantem temeden jenjang tamajungba akümer, ta ashi.

"Tesüiba küm trok tsüingda matalokbatema tang atalokdar aser tesem ajaklen nungi Khristantem anema inyaker. Khristantemi joko kiyimba sentongtem aser tasoba anogomong benjungtema junga memongtettsüsa kümogo,

mesüra pei kidang sarasadema magiteter, kechiyong telok kari parnok anema inyaker," ta Bhawani-i ashi.

"State nung Arogo aser Khristantem anema inyaker. Police-i tamakertem masü saka Khristantem ang apur. Iba dak alia state tesem ajaklen Tenla kitem shibanger," ta pai ashi.

"Kechiba police-i ozüing alema inyaker. Kechiba parnoki Arogo dangbo registration meshir.

Sarasademtsü atema registration agitsü atema ozüing mali. Khristantemi ken o benokyonga police-i ken oji mesükshir. Item tatalokba ya yimsüingtem nung dang masü saka state yimtiba, Raipur nunga ataloker. Tesem aika nung Tenla kitem shibangogo aser Khristantemi sarasadema mesütettsüsa kümogo. Asenok ya Taliban yimsüsüba kubok alir asü?" ta pai asüingdang.

ANOGO ABEN TSÜNGREM DEN

Ne kangki apuang

Idangji Yisui Pa nütsüingtem dang ashi, "Kari Kü sülen arunera, pai pei sasa azüokang aser pei kangki apur kü sülen arung. Mathi 16:24

Ne kangkiji kecha mashishi na asoshi Tsüngremi mulungba lir. Kangki aputsübaji teshimetetba ka lir; ibai ne tashi dak alia masü. Na temang timtem alitsü akok mesüra tashi manga tanur alitsü akok saka ibaji kangki apuba den taitep. Tiaji mesüra ne mapa nungi adokbaji ne kangki masü. Ne kangkiji kecha taa makai tekümtet asoshi Khrista timatempa shilem agiba lir (Fil. 3:10). Pauli ashi tangar Khristan taküm nung tashi (mature) kümdaktsüba nung Pa timatempa nung pelar (Kol. 1:24).

Yisui Khrista sülen aotsü asoshi mezüingbuba pei sasa azüoktsüla. Tazüokba makai Khrista sülen anidaktsübaji tamakoktsü. Tsüngremer talangzükba atalokdaktsütsü asoshi idakji timtem kar lir. Tekümtet bener arutsü asoshi Khrista timatempa ama na meketa alirtem nem Tsüngremi tekümtet agütsütsü asoshi nai timtem kar aremzüktsüba lir. Nütsüingtemi Yisui Khrista ta mangatet tashi Yisui nütsüingtem den kangki indang mejembi (Matt. 16:21). Nai tamasa Yisui Khrista ta mangatet tashi nai kodanga kangki timtem maremzüktsü. Kodang nai Khrista den tesendaktep yangludir, Pai ne dang ne kangki sayutsü.

Kangkiji medeni Khristan yimsü mali. Timtem makai nai Khrista den tesendaktep akatsü atara mesüra ne mapang tajung atara, Khristaji ne taküm ta nai kodang meshitettsü. Na asoshi Tsüngremi mulungba nung kangki dena lir. Mezüingbuba, ne kangki apuang; idangji nai Pa anidaktsü.

India nung putirtemi kanga shisa kaa vote agütsütsü ayongzük

March 06, 2024: India nung Khristan putirtemi sensotem dang linük nung secular democracy wazüka ayutsü atema taruba Lok Sabha election nung kanga shisa kaa vote agütsütsüla, ta ayongzükogo.

36buba Catholic Bishops' Conference of India (CBCI) senden nung linük nung telemsa adokba aser Khristantem anema inyakba tebilemtsü onüktem lemsatapa liasü.

Parnokisa linük temzüing kubok inyaksü aser democracy wazüka ayutsü atema lenirtem shimtettsü nüngdak, ta bangjemba den külemi Khristantem reshikangshi liaka Arogo maneni sensakertem tenzüktsü bangjem.

Hopta ka piyong senden nungji diocese 174 nungi Khristan putir 170 shi dena liasü. Iba senden omenji "Church's Response to the Current Socio-political Situation of the Country and Benefits & Challenges of Artificial Intelligence (AI)" liasü.

India nung secular maitsü samadar ta bilemba mapang ka nung putirtemi sensotem dang kanga shisa kaa vote agütsütsü ayongzük. BJP-i aniba sorkar tanabuba kümsük tembanger

asertaruba election nunga takok ngura India ya Hindu linük, ta sangdongtsü atema lenmang lapoktsütsütsüa akok ta tebilemtsü akar.

Mahatma Gandhi'er tanabuba semchir, Tushar Gandhi-i, iba amaji süra linük nung secularism aser democracy jenjang mejungi akümtsü, ta shiogo.

2023 küm kija nung India nung Khristantem anema inyakba tatalokba 720 dak tema liasü. Khristantemi yamaji timtem ajangshiyonga putirtemi maneni sensakertem tenzüktsü bangjemogo. Ajisüaka putirtemi sensotem dang democracy pusemer lenirtem nem ang vote agütsütsüla, ta ayongzük.

Putirtemisa Manipur nung Khristan majority Kuki nung aser Hindu Meitei nung tsüingda yimjung alitsü atema ayongzük.

Putirtemisa India nung Arogotem dang yimjung atema lumia sarasademtsü ayongzük.

Taküm April-May nung Lok Sabha election agitsü lia putirtemi diocese ajak dang linük nung yimjung aser tesünap atema March 22 nü lumia sarasadema amongtsü ayongzük.

AO OSHI ANGAZÜKDAK: TANÜ ANGAZÜKTSÜBA OJANG



Sorokroksü

(adj) teku nongbanga sorok ta atuba(chest congestion)

* Tantsür tambur aika teku nung sorokroksü atur.

Soruzük

(v) chi asoba renem (finished rice cooking)

* Mimung nung chi karaa soruzük.

OLONG PAITEP # 6719

Grid for OLONG PAITEP # 6719 with numbers 1-17 in a crossword pattern.

TIPIEN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6718 TELANGZÜBA

TIPIEN :

- 1. Tesangra, 5. Mungo,
7. Kisen, 8. Salem, 12. Semki,
14. Kilem, 15. Kensü,
16. Sangpang.

LANGTSÜNGLEN :

- 1. Temesen, 2. Raksa,
3. Aon, 4. Aso,
6. Nile, 9. Alizüng, 10. Omen,
11. Lemta, 13. Ola, 14. Kin.

NAI-A YA METETTER MA

Arishi küm 74 tain Padma Shri Dr Kiran Seth-i "solo cycling" expedition nung linük ajunga sema senzüogo. Dr Kiran ya SPIC MACAY founder aser taoba Professor Emeritus IIT-Delhi lir. August 15, 2022 nü pai Srinagar nungi "solo cycling" expedition mezüngbuba tenzük aser ibaji February 14, 2023 nü Kanyakumari nung tembang.



Kanyakumari nungi pai SPIC MACAY Cycle Yatra tanabuba shilem tenzük Kerala, Goa, coastal Karnataka, Maharashtra, Chattisgarh, Jharkhand, Bihar, West Bengal ajanger Assam nung Guwahati atong aser idangji Assam Governor den ajurutep. Dr. Kiran Seth-i Arunachal Pradesh semdang, iba sülen Agartala semdang Silchar atong. NIT Dimapur-ia iba yatra ya Nagaland nung ayongzük aser idangji Dr. Kiran-i Nagaland University campus, Kohima semdang aser Nagaland Governor den ajurutep. NEHU aser NIT Meghalaya-i Dr Kiran den sensaksemtsü jaok aser idangji Meghalaya Governor den ajurutep. Tatemsa pai IIT Guwahati nung lecture ka agütsütsü aser March 7, 2024 nü Patna-i cycle yatra meyipa aotsü.

Guwahati nung küm 40 tema taila doctor inyaker ka apu



Guwahati, March 6, 2024 (Agencies): Guwahati nung küm 40 tema doctor ka ama inyaka arur ka police-i puogo. Taila doctor ji Premananda Rai lir ta jangjaogo aser küm 40 tema doctor ka ama inyaka arur. Lal Ganesh kiyong nung New

Mahamaya Medicos pharmacy nung pai shirangtertem anepalua aru. Rai-i West Bengal nungi Surendra Narayan ta ser doctor ka indang registration number amshia aru. 1983 nungi pai iba mapa inyaka aru. Rai-i taila death certificates

agütsüba atema tai tonglokja lir. Dr Abhijit Neog-i ken o benokba nung ajemdaker police-i Mongulbar aonung Rai apu. Rai apuba sülen pa indang pharmacy shibangtsüogo aser pai inyaka arubatem bushisüngdangtsü tenzükogo.

Congress lennir Pawan Khera-i Assam CM dang ashikülaker alaker

Guwahati, March 6, 2024 (Agencies): Assam chief minister Himanta Biswa Sarma ya 'Gaddar' (ashikülaker) ka lir taCongress lennir Pawan Khera-i ashi. "Onoki Himanta Biswa Sarma ya ashikülaker ka ama züngshir. Onok den shitak maliba nisung kati kodaser parnok den shitak alitsü? Pai pa ya Assam indang Mama (maternal uncle) ama ajar saka Madhya Pradesh nungia

Mama tanga ka Shivraj Chauhan liasü. Pa dak kechi atalok, kasa tiaji Himanta Biswa Sarma-i ajurutsü" ta Khera-i ashi. "Ashikülaker ka indang aika jembitsü mali, saka Congress ashioktür kati kodaser Narendra Modi den chichia litettsü?" ta Congress lennirisa ashi. "Himanta Biswa Sharma-i Congress den tongtepratepa dang alir kechiyong BJP-i tamakok anguba nung pai aotsülen atema

tsübur, ta paisa ashi. "Nenok temulung anisüngzükang, onoki pa magizüktsü. BJP lennir aikati Congress den osang agiteper. Himanta Biswa Sarma-i BJP nung adenba sülen tiyazü jembir, pai tangar ashioktüba nung Prime Minister ajatettsü meranger. BJP-i parnok list metetdaksüogo aser BJP lennir aikati onok den tongtepdar" ta Congress lennir Pawan Khera-isa ashi.

TIPRA-i NDA nung adener; Tripura cabinet nung züngsem 2 anioxtsü

Agartala, March 6, 2024 (Agencies): Tripura nung TIPRA party-i BJP-i aniba National Democratic Alliance (NDA) nung adentsü lemtetogo. Iba ajanga Tripura cabinet nung nübo melenshitsü aser TIPRA party nungi züngsem ana Tripura cabinet nung anioxtsü

imlar. TIPRA MLA ana leader of opposition Animesh Debbarma aser Brishaketu Debbarma na Tripura cabinet nung adentsü ta osang angazükter. March 7, 2024 nü Animesh aser Brishaketu nati tezüngzüktep agitsü akok.

Centre, Tripura sorkar aser TIPRA tsüngda tripartite agreement nung sign sütepa sülen anogo ana lir TIPRA Motha-i NDA nung adentsü lemtet. BJP-i aniba NDA nung TIPRA adenba ya Lok Sabha election jakdang BJP jenjang tajungba akümer.



March 2, 2024 nü Guwahati nung 20th Sunsilk Serum Mega Miss Northeast 2024 tetoktepa nung Meghalaya tsür Ridamaya Passah (tiyongtsü)-i takok korang nguogo. Ridamaya Passah-i Mega Miss India - Top Model of the Universe takok angu aser lai Top Model of Universe pageant nung India tenüng nung shilem agitsü. Iba tetoktepa nung runner-up titles maliasü aser Passah den Assam tsür Dipti Basumatary aser Manipur tsür Monica Konjengbam nungeri takok angu. Ridamaya Passah ya Women's College Shillong nung a BA final year student lir aser laisa Shillong nung The Loft Winter Queen pageant nung takok korang ngua liasü. 20th Sunsilk Serum Mega Miss Northeast 2024 nungsa subtitle winners liasü. Assam tsür Dipsikha Deka-i Sunsilk Serum Miss Shine Queen, Manipur tsür Monica Konjengbam-i Hotel Daaysco Oley Allo Miss Congeniality, Meghalaya tsür Emichwa Daka B Ladia-i Dazller Eterna Miss Glamorous aser Assam tsür Dipti Basumatary-i Butterfly Miss Fashion Icon subtitles angu.

NAGALAND PUBLIC SERVICE COMMISSION
KOHIMA

NO.NPSC/EXAM-3/2023

Date Kohima, the 6th March 2024

NOTIFICATION

In pursuance of the Nagaland Public Service Commission Advertisement No. NPSC-3/CTSE (Agri., Allied & Others) 2023 dt. 29.04.2023, Addendum/ Corrigendum dt. 02.05.2023, Addendum dt. 10.05.2023 & dt. 24.05.2023, the Commission, on the basis of aggregate marks obtained in the written examination and Viva-voce, is pleased to recommend the following candidates in **order of merit** for appointment to various posts under the Government of Nagaland :

Item No. 1(a) 1 (one) post of Assistant Conservator of Forest (Class-I Gazetted) under Environment, Forests & Climate Change Department.

Rank	Name	Roll No	Remarks
1 st	SOPUCHINGMAK	23TA2258	B.T. Chang/Forestry

Item No. 1(b) 3 (three) posts of Forest Ranger (Class-II Gazetted) under Environment, Forests & Climate Change Department.

Rank	Name	Roll No	Remarks
1 st	SENLE APON	23TA2191	Forestry
2 nd	BOKIVI SEMA	23TA2200	Forestry
3 rd	JEU L KHIAMNIUNGAN	23TA2162	B.T. Khamniungan/Forestry

Item No. 2(a) 5 (five) posts of Economics & Statistics Officer (Class-I Gazetted) under Economics & Statistics Department.

Rank	Name	Roll No	Remarks
1 st	SEVOSALU RESU	23TA1835	
2 nd	VETALU CHIERO	23TA1972	
3 rd	INGAUZEULE KENRANG	23TA1823	
4 th	NEITSHOU KROME	23TA1818	
5 th	NCHIBAMNEU NEWMAI	23TA1847	B.T. Zeliang

Item No. 2(b) 10 (ten) posts of Inspector of Statistics (Class-III Non- Gazetted) under Economics & Statistics Department.

Rank	Name	Roll No	Remarks
1 st	CHOTHAZO NIENU	23TA1795	
2 nd	MHABEMO OVUNG	23TA1715	
3 rd	WONDANGLO Y EZUNG	23TA1782	
4 th	KHRIEZEPUNUO RHETSO	23TA1849	
5 th	MHAYANI ODYUO	23TA1894	
6 th	TELALOU MERO	23TA1826	
7 th	WANGMOI KONYAK	23TA1855	B.T. Konyak
8 th	AKUMCHILA TSONGS YIMCHUNGER	23TA2014	B.T. Yimkhiung
9 th	LUSHIAN H	23TA1843	B.T. Khamniungan
10 th	THONGMONGYEMBO	23TA1934	B.T. Chang

Item No. 3 2 (two) posts of District Sports Officer (Class-I Gazetted) under Youth Resources & Sports Department.

Rank	Name	Roll No	Remarks
1 st	KENONGOTO THOKHWE	23TA2839	
2 nd	ATHRONG YIMCHUNGER	23TA2809	B.T. Yimkhiung

Item No. 4 2 (two) post of Assistant Public Prosecutor (Class-I Gazetted) under Justice & Law Department.

Rank	Name	Roll No	Remarks
1 st	NEISEZONUO LIEGISE	23TA2594	
2 nd	SONKANG HIMJAI CHANG	23TA2576	B.T. Chang

Item No. 5(a) 8 (Eight) posts of Agriculture Officer (Class-II Gazetted) under Agriculture Department.

Rank	Name	Roll No	Remarks
1 st	YEANGBO JACOB	23TA0583	
2 nd	TUMCHOPEMO JAMI	23TA0938	
3 rd	KHESI YHOKHA	23TA0833	
4 th	CHUMDEMO N JAMI	23TA0857	
5 th	DIEZELHOUNO CHUCHA	23TA0899	
6 th	LONGHAM PHOM	23TA0637	B.T. Phom
7 th	SERILA K SANGTAM	23TA0479	B.T. Sangtam
8 th	MULIO KHIAMNIUNGAN	23TA0186	PwBD

Item No. 5(b) 42 (Forty Two) posts of Agriculture Inspector (Class-III Non-Gazetted) under Agriculture Department.

Rank	Name	Roll No	Remarks
1 st	AJANBENI EZUNG	23TA1082	
2 nd	B LAKMEI PHOM	23TA0588	
3 rd	WATISENLA IMSONG	23TA1077	
4 th	SHINGLOI H	23TA0635	
5 th	KIHETOLI T KIBA	23TA0895	
6 th	ARENUNGLA JAMIR	23TA0911	
7 th	KIVIKA SHOHE	23TA0317	
8 th	L LEIWANG	23TA0811	
9 th	KIKRUKHRIENUO RUTSA	23TA0875	
10 th	AJUNGLA LONGCHAR	23TA0883	
11 th	I YANCHU CHANG	23TA0243	
12 th	ZALEKHU LOHE	23TA0618	
13 th	THEPFUSANUO NGUKHA	23TA1003	
14 th	LIMABENLA WALLING	23TA0472	
15 th	RENBONTHUNG TUNGOE	23TA0580	
16 th	BANSANG	23TA0550	
17 th	IMLISANEN JAMIR	23TA0626	
18 th	TIATEMSU JAMIR	23TA0120	
19 th	MOAKALA JAMIR	23TA0866	
20 th	SHEKHOZO VERO	23TA0589	
21 st	KHRUNETALU SWURO	23TA0300	
22 nd	A H HOKITO ZHIMOMI	23TA0946	
23 rd	MEYIKUMLA JAMIR	23TA0837	
24 th	HEZAKI JIMO	23TA0925	
25 th	OLIVI HOLO	23TA0526	
26 th	IMKONGSUNEP WALLING	23TA0991	
27 th	VIRHUPU DOMEH	23TA0130	B.T. Chakhesang
28 th	LAKMEI M PHOM	23TA0553	B.T. Phom
29 th	MANWANG W KONYAK	23TA0616	B.T. Konyak
30 th	OMEGA YIMCHUNGER	23TA0629	B.T. Yimkhiung
31 st	P EIPA PHOM	23TA0533	B.T. Phom
32 nd	TSULUN K	23TA0303	B.T. Yimkhiung
33 rd	WANSHOM W KONYAK	23TA0611	B.T. Konyak
34 th	WIKHAILE	23TA0397	B.T. Zeliang
35 th	SONGPUING PERI	23TA0687	B.T. Pochury
36 th	SEPILA M SANGTAM	23TA0814	B.T. Sangtam
37 th	HANGLINKHUMBA	23TA0246	B.T. Chang
38 th	HOISHE Z SUMI	23TA0642	B.T. Sumi (Kiphire)
39 th	SANGTSUI	23TA0647	B.T. Khamniungan
40 th	HANGJI B	23TA0562	B.T. Khamniungan
41 st	TSALANGBA	23TA0394	B.T. Sangtam
42 nd	PENSUBO NEWMAI	23TA0678	B.T. Zeliang

Item No. 6 4 (four) posts of Tourist Officer (Class-II Gazetted) under Tourism Department.

Rank	Name	Roll No	Remarks
1 st	KHETO YHOKHA	23TA1516	
2 nd	ABIGAIL RUUZENUO SOLO	23TA3211	
3 rd	LENTINA LONGKUMER	23TA2959	
4 th	AGUMBE NRING	23TA3216	B.T. Zeliang

Item No. 7 3 (three) posts of Junior Soil Conservation Officer (Class-II Gazetted) under Soil & Water Conservation Department.

Rank	Name	Roll No	Remarks
1 st	TOKA JEMU	23TA2484	
2 nd	T YANSHEN EZUNG	23TA2252	
3 rd	BOMCHAI L ONG	23TA2453	B.T. Phom

Item No. 8(a) 9 (nine) posts of Assistant Planning Officer (Class-II Gazetted) under Planning & Transformation Department.

Rank	Name	Roll No	Remarks
1 st	VEPA	23TA0990	
2 nd	TIALEMBA	23TA2037	
3 rd	VUNGATHUNG Y TUNGOE	23TA0936	
4 th	LOKTIMEN LONGCHARI	23TA0992	
5 th	MESHENJI APON	23TA1025	
6 th	SHOSHUTHO PHOJI	23TA1891	
7 th	ZHOKHOSA DAWHUO	23TA0987	B.T. Chakhesang
8 th	P YONGNYU PHOM	23TA0905	B.T. Phom
9 th	CHUMDILA ANAR	23TA1002	B.T. Sangtam

Item No. 8(b) 2 (two) posts of Planning Assistant (Class-III Non-Gazetted) under Planning & Transformation Department.

Rank	Name	Roll No	Remarks
1 st	OUNGNGOI C S KONYAK	23TA0132	
2 nd	LALEN S PHOM	23TA0918	B.T. Phom

Item No. 8(c) 11 (eleven) posts of Evaluation Inspector (Gazetted Junior Grade-B) under Planning & Transformation Department (Evaluation).

Rank	Name	Roll No	Remarks
1 st	SEYIEVITUO VITSO	23TA3066	
2 nd	ERENBEMO LOTH	23TA2008	
3 rd	TAJENYULA	23TA1848	
4 th	VESUDULU YOHO	23TA2025	
5 th	METSESULU VEYIE	23TA1690	
6 th	ARHONI C JAMI LOTH	23TA2994	
7 th	NUVETALU DAWHUO	23TA1850	
8 th	MHATHOLETUO TACHU	23TA1938	
9 th	SOLOMON	23TA2033	B.T. Chang
10 th	KEDIRISI NAMDAW	23TA0139	B.T. Zeliang
11 th	MUSUSHI	23TA1933	B.T. Tikhir

Item No. 9(a) 1 (one) post of Deputy Librarian (Class-II Senior Gazetted) under Art & Culture Department.

Rank	Name	Roll No	Remarks
1 st	SURHU DOZO	23TA2598	B.T. Chakhesang

Item No. 9(b) 1 (one) post of Library Assistant (Class-III Non-Gazetted) under Art & Culture Department.

Rank	Name	Roll No	Remarks
1 st	VITHO-U MERA	23TA1514	

Item No. 10 8(eight) posts of Horticulture Inspector (Class-III Non-Gazetted) under Horticulture Department.

Rank	Name	Roll No	Remarks
1 st	CHAPI CHALE	23TA2444	
2 nd	NRITHUNG KIKON	23TA2482	
3 rd	AKIVITO T YEPTHO	23TA2448	
4 th	SEDEVILIE	23TA2502	
5 th	M JANGYUKALA	23TA2509	
6 th	VEDECHIYI ROKHA	23TA2463	
7 th	CHANGTOLA CHANG	23TA2418	B.T. Chang
8 th	IZAILE KULIMBE	23TA0961	B.T. Zeliang

Item No. 12 7 (seven) posts of Extension Officer (Class-III Non-Gazetted) under Sericulture Department.

Rank	Name	Roll No	Remarks
1 st	SHILURENEM LONGKUMER	23TA2914	
2 nd	P NGUPYA KONYAK	23TA2917	
3 rd	ELULE	23TA0151	
4 th	NYANBENI M KIKON	23TA2911	
5 th	NOKZENKETBA LONGKUMER	23TA2918	
6 th	ANGUKALI CHOPHY	23TA2901	
7 th	JEOLAM	23TA1114	B.T. Khamniungan

Item No. 13 1 (one) post of Extension Officer (Class-III Non-Gazetted) under Sericulture Department.

Rank	Name	Roll No	Remarks
1 st	KUMTSU LIMS	23TA2088	B.T. Yimkhiung

Item No. 14 1 (one) post of Extension Officer (Class-III Non-Gazetted) under Sericulture Department.

Rank	Name	Roll No	Remarks
1 st	LOLENYANGLA S CHANG	23TA2915	B.T. Chang

Item No. 15 1 (one) post of Artist (Class-III Non-Gazetted) under Art & Culture Department.

Rank	Name	Roll No	Remarks
1 st	Y. AYEM	23TA1085	B.T. Konyak

Item No. 16 11 (eleven) posts of Veterinary Assistant Surgeon (Class-I Gazetted) under Animal Husbandry & Veterinary Services Department.

Rank	Name	Roll No	Remarks
1 st	MEYISUNGIT LONGKUMER	23TA3232	
2 nd	METSHEPE LASUH	23TA3227	
3 rd	KERUULENUO YHOME	23TA3296	
4 th	KHUZOVINU RICH	23TA3291	
5 th	ALE KHAPE	23TA3272	
6 th	KIKALI G SUMI	23TA3237	
7 th	IMTILONG LONGKUMER	23TA3255	
8 th	YATO KONYAK C	23TA3269	B.T. Konyak
9 th	THANGHOI H KHIAMNIUNGAN	23TA3245	B.T. Khamniungan
10 th	O KUPMEI PHOM	23TA3292	B.T. Phom
11 th	T CHOMANGPILA	23TA3289	B.T. Sangtam

Item No. 21 1 (one) post of Demonstrator (Physics) under Technical Education Department.

Rank	Name	Roll No	Remarks
1 st	SERHO POJAR	23TA2888	B.T. Pochury

Note:

- Backlog vacancies shall be notified in the next advertisement for CTSE 2024.
- Any selected candidate intending not to accept the post for which he/she is selected may submit a **Non-Acceptance Letter** on or before 13th March 2024.

[Signature]
(NUNGSANGMENLA IMCHEN)
Secretary,
Nagaland Public Service Commission,
Kohima

CRHSS Mokokchung 23rd Annual Sports Meet kadagi



Christian Residential Higher Secondary School, Mokokchung 23rd Annual Sports Meet tongti tesemdanger Nagaland Bible College, Mokokchung nung Asst.Prof. Wb.Lima Lemtur-i ball metsüa tenzüksür.

Mokokchung, Metsüremi/ March 6 (TYO): Christian Residential Higher Secondary School (CRHSS) Mokokchung pur tanü 23rd Annual Sports Meet CRHSS Ground nung tenzükgoko. Tanü iba saisapong tenzükba

sentong nung tongti tesemdanger Nagaland Bible College, Mokokchung nung Asst.Prof. Wb.Lima Lemtur-i mapang tatsüka agia tajungshiba aolen kar jembidang, asayar ka asoshi takok angutsübaji dang masü saka asaya nung pei dak aketba sempet amshiteta tajungtiba nung shilem agitsü kanga dang tongtipang, ta ashi.

Asayar ka jagi teti nentaka tajungtiba asaya-a takok angutsü merangtsüla aser külem asayartem akümtsüba asayatsüla, iba den külemi temelungtetba den ano tasü ita asayaba ajanga takok angutsü lenmang sadem sadema lapokteter, ta Lima Lemtur-isa school tanur asayartem ajungmeso ashi.

Christian Residential Higher Secondary School, Mokokchung pur 23rd Annual Sports Meet ya March 6 nü nungi March 8 nü tashi agitsü.

Paris Olympic: Tetsür aser tebur Hockey asaya July 27 nü tenzüksü

Metsüremi/March 6, 2024 (Agencies): International Hockey Federation (FIH) Tir Tayyab Ikram aser International Olympic Committee (IOC) Tir Thomas Bach nati Paris 2024 atema Hockey asaya asoshi mapanglem sangdongogo, koba July 27 nungi August 9 tashi asayatsü.

XXXIII Olympiad atema hockey asayamung ya Paris anasa Colombes nung Yves-du-Manoir Stadium nung asayatsü, koba 1924 Olympic Games arena lir.

Taküm iba asayamung nung tetsür team 12 aser tebur team 12 tokteptsü, kong Dutch

tetsür aser Belgian tebur team-ia shilem agitsü, shirnoki Olympic Games Tokyo 2020 nung gold medal ngur lir.

Paris Olympics nung tetsür aser tebur naprongla hockey asayamung July 27 nü tenzüksü. Paris 2024 nung mezüngbuba asaya ya tebur Pool A nung Great Britain aser Spain na 10:00 CEST nung asaya-a tenzüksü.

Tetsür tetoktepba ya kasa anogo 19:45 CEST nung Pool B nungi Tokyo 2020 silver medalists Argentina aser USA na mezüngbuba asayatsü.

Tetsür aser tebur naprongla asaya pool stages ya August 3 tashi asayatsü

aser iba sülen August 4 nü nungi tenzüka knockout asayatem asayatsü. Paris 2024 tebur medal atema asaya August 8 nü asayatsü aser tetsürtem medal asaya August 9 nü asayatsü.

Paris Olympics hockey asayamung atema ticket Bodhbarnü nungi ayok tenzükgoko.

1908 küm London Olympic Games nung mezüng asayaba sülen tebur hockey asaya ya taküm agi 25benbuba asayatsü lir. Olyimpics nung tetsür hockey asaya ya Moscow nung 1980 küm nungi asaya tenzükgoko aser taküm agi 12benbuba atonga asayatsü lir.

Yashasvi Jaiswal Test ranking nung top 10-i iogo

New Delhi, Metsüremi/ March 6 (Agencies): India nunger opener Yashasvi Jaiswal Bodhbarnü sayaba ICC Test rankings nung batter tem rongnung top-10-i iogo. Pa indang career nung tang mezüngbuba pai iba alizüng tongtetogo.

Tang England den asaya aliba Test asayamung nung kanga junga asayaba sülen Jaiswal top 10-i iogo.

2023 küm test nung mezüngbuba asayaba sülen jaiswal tang jenjang ana tejakdangi tua 10buba nung lir. Pai rating points 727 ngua lir.

England den kanga junga asayaba sülen Jaiswal-i otsü tasen yanglua pa India nunger batter tem rongnung Test asayamung ka nung run 600 aser tema yanglurtem rongnung densemogo. Left-handed batter tem rongnung pa kijai-i iba ya ajangzüktetogo.

Arishi küm 22 tain asayar ya Test asayamung ka nung run 600 dak tema yangluba India nunger asayar pongububa dang lir. Iba alizüng ya Sunil Gavaskar, Dilip Sardesai, Rahul Dravid aser Virat Kohli nungeri tongteter lir.

Test pezü nung pai run 655 yangluogo aser pa indang average 93.57 lir. Pai iba asayamung nung half century ana aser double century ana yanglur lir. Tang pa Sunil Gavaskar-i Test asayamung ka nung run 774 yanglur aliba meneptsü atema rangloker asayadar.

Kasa mapang nung England den Rajkot nung tasembuba Test asayaba mapang run 131 yangluba sülen Rohit Sharma-a jenjang ana tejakdangi tua tang 11buba nung lir.

Virat Kohli, shiba iba asayamung nung masayai arudar, pa-a jenjang ka

tejakdangi tuogo aser pa tang tibuba nung lir.

Top three batter tem rongnung Joe Root-i Steve Smith ajateta tanabuba nung lir. England nunger asayar yagi Ranchi nung asayaba mapang century ka yanglua liasü, ajisüaka Smith-i run aika meyangluteti arudar.

New Zealand den Wellington nung Test asayaba mapang junga masayatetba sülen Australia nunger batter Marnus Labuschagne jenjang pongu asepzüka luogo.

Bowler tem rongnung India nunger asayar Ravindra Jadeja jenjang ka asepzüka lua tang tenetbuba nung lir. Australia nunger bowler Josh Hazlewood aser Nathan Lyon naprongla New Zealand run 172 agi akokba asaya nung kanga junga asayaba sülen tejakdangi tua tang pezübuba aser trokbuba nung lir.

MULONGNEN O



ASO: 13/01/1950

ASÜ: 26/02/2024

Asür Alimeren Pongen (GB) Chakpa

Ozü asüko mapang nung onok mulong anisüngzükdaktsüba atema pelapa lemsateper. Temeim kin ungo, obala shirangba anogo nungi tasüba mapang tashi medemer, kiyonger aser yimer bendang palala nungi shirnokisa ozü asüko nung sarasadem, nübü aser rongsen agi yariba atema ajak dang kangasa pelaba lemsateper. Tulusang Tsüngremi nenok ajak moatsütsü ozü kibong tamang aser tiyimla.

-Temeim Kinungtsü aser Chirnurtem.

WFI-i wrestler tem nem tetuyuba agütsü

Metsüremi/March 6, 2024 (Agencies): Wrestling Federation of India (WFI)-i, taruba trail nung pei state tenüng nungi dang shilem agitsü atema melatsü aser wrestler ka category ka dak tema nung shilem agitsü melatsü, ta metetdaktsüogo. Iba tetoktepba ya March 10 nü tenzüksü.

Mongolbarnü sangdong ka ajanga WFI-i, "wrestler tem shirnok Jaipur nung Senior National Championship nung shilem agiogo, parnok state jangjatsü atema WFI Licence Book, Birth Certificate, Adhar Card bener arutsüla," ta metetdaktsü.

"Ad-hoc committee-i ayongüka jaipur nung agiba

nationals nung wrestler tem kar Haryana nungi süaka Arunachal Pradesh aser Sikkim amala state tenüng nungi asayaogo. Iba ya tai aser onoki yamai asayatsü memelatsü," ta WFI-i ashi.

"Sikkim aser Arunachal ya affiliated state body tema masü. Onoki pei state tenüng nungi asayaba wrestler ka danga menokdangtsü. Arunachal amala state ka nungi wrestler ka arura onoki special invitee ama pa shilem agidaktsütsü," ta source-i ashi.

Trails ya Asian Championships aser Asian Olympic Games Qualifiers atema agitsü, koba Bishkek, Kyrgyzstan nung asayatsü lir.

Bellingham nem asaya ana atema tenokdangba agütsü



Metsüremi/March 6, 2024 (Agencies): Taoba hopta Valencia den asayaba mapang red card achiba sülen Jude Bellingham La Liga nung Real Madrid pur taruba asaya ana nung shilem magitsü atema tenokdangba agütsüogo, ta Spanish football federation-i Bodhbarnü sangdong ka ajanga metetdaktsü.

Bellingham nem red card agütsüba atema Madrid puri temepeshiba ka agütsü, ajisüaka federation indang disciplinary committee-i magizükgoko.

Real puri ashiba agi, referee Jesus Gil Manzano-i Bellingham nem red card agütsüba ya aibelen ka lir.

England nunger international asayar shiba tang asaya aliba season nung La Liga nung goal timtiba idaktsüba asayar lir, pai

Valencia den goal 2-2 agütsür tembangba asaya nung referee-i asaya mapang tembangba whistle apuli goal ka idakja liasü.

Iba sülen Bellingham referee dangi asema orr goal ya agitsüla ta khanga liasü saka pa nem red card ka agüja liasü. Referee Gil Manzano-i ashiba agi, pai o kanga sashia jembia liasü.

Iba enokdangba agütsüba sülen midfield nung asayasang ya Real Madrid pur La Liga nung Celta Vigo aser Osasuna na den asayatsü aliba asaya nung shilem magitetsü.

La Liga nung Real Madrid pur tang temaba jenjang nung lir. Parnok tanabuba jenjang nung aliba Girona dang nungi point tenet aser tasembuba nung aliba Barcelona dang nungi point ti agi timba lir.

BILEMDANGANG
"O agi nisung ka peladaktsür aser jashidaktsür."